

31. juli 2016

Inatsisartut suleriaasianni § 33 naapertorlugu aallajangiiffigisassatut siunnersuut imaattoq matumuuna ingerlatippara:

Nukissiorfiit innaallagissamik imermillu tunisassiornerminni pilersuinerannillu aalisakkanuk tunisassiorfinnut illoqarfinni nunaqarfinnilu ataasiakkaani 41,5%-imik akeqartitsinerup assinganik nunap qaavani toqoraavinnut s.a. Neqi A/S aamma Lilleholm Aps-imut atuutinneqalernissaannik Naalakkersuisut piginnaatinneqarnissaannik Inatsisartut aalajangiiffigisassaattut siunnersuut

(Inatsisartunut ilaasortaq Suka K. Frederiksen, Siumut)

Tunnngavilersuut:

Aalisakkanik tunitsiviit imermut sarfamullu aningaasartuutaasut 41,5 procentii akilerneqartarput taamaasilluni tunitsivinni tuniniakkanut aningaasartuutit 58,5 procentimik apparneqartarlutik.

Tamanna nunami inuussutissanik inerisaanermi toqoraavinnut s.a. Neqi A/S-imut atuutilersineqarpat suliffeqarfimmuut Neqi A/S-imut 1,5 mio. kr.-inik aningaasartuutikillisaataassaaq¹.

Maluginiagassaavoq tapiissuteqarnermi sarfaq ”mingutsitsiviunngitsoq” (Grøn energi) atorneqartillugu sapinngisamik tamarmik assigiissakkamik akilersuinissaat pisariaqarsorinarmat, ass. Narsami Neqi A/S, aappaanni Qaqortumi aalisakkanik tunitsivimmi assigiinngitsumik akilersuisoqarpoq, tamannalu nalilersuinermi ilanngullugu saqqummersinneqarnissaa pisariaqarpoq.

Nunatsinni uumasuuteqarnermik inuussutissarsiuuteqartut ikiliartortillugit namminerlu pilersornerunissaq anguniartillugu pingaaruteqarpoq toqoraaviup nutaaliaasup Neqi A/S aningaasarsiornikkut tunitsivittuulli allatuulli nutaamik aqutissiuussiffigineqarnissaat.

Toqoraavik pilersinneqarmat siunertarineqarpoq 30-35.000 savaaqqat toqorarneqartalissasut, ukioq kaajallallugu sulisut 25-30 pilersinneqarlutik kisianni tamanna killormut ingerlasoq takuneqarsinnaavoq taamaattumik toqoraavik iluatsiffiusumik ingerlatsiviussappat pingaaruteqarpoq aningaasartuutit annikillisarinnissaat tamannalu ilaatigut ingerlatsinermut aningaasartuutikillisaanikkut aqutissiorneqarsinnaavoq.

Qujanartumik Neqi A/S namminerisamini qimminik nerukkaatissanik tunisassiorluni misileraalluni ingerlatsivoq, taamatullu tunisassiornikkut, naatitsinikkullu inerisaaniarnermik ingerlataqarluni, tamannalu qanimut malinnaavigissallugu soqutiginarpuvoq.

Toqoraavik nunatsinnut pingaaruteqarpoq, toqoraanerullu nalaani piffissamik killilimmik sulisunik 70-80-nik sulisoqartarluni taamaattumik pingaaruteqarpoq inerisaanikkut suli annerusumik pisisartunut tunisassiat, nunanut allanut akinut unammillersinnaasunngortitsinissat anguniassallugit.

Pingaaruteqarpoq naqissusissallugu akikillisaanerit sapinngisamik pisisartunut iluaqutissanngorlugit ingerlanneqarnissaat anguniartuartaqaratsigu taamaasilluni nunatta pissarititai suli annerusumik siammarterlugit annertusaasinnaassagatta niuernikkullu iluaqutaanerumik pilersueqataatitsilerluta.

¹ Nunalerineq pillugu ataatsimiititaliarsuup isumaliutissiissutaa februar 2014, qup. 93

Maluginiagassaavoq aalisakkanut tunitsivinnut imermut sarfamullu akikillisaatit qanorluunniit suliffeqarfissuit iluanaaruteqartigigaluarpata atuuttuartussatut isikkulerlugit ingerlanneqarneri oqallisigilluassallugit pisariaqarmat. Tassani pingaaruteqarpoq suliffeqarfimmut akilersinnaassuseq anguneqarpat tapiissutit nalilersussallugit piffissanngorsimassasut isumaqarfiginarmata.

Naggataatigut kaamaattuutigissavara Naalakkersuinikkut aqutaasumik Inuili, Neqi A/S taamatullu Lilleholm Aps qanimut malinnaavigineqaqqullugit suli annerusumik tunisassiornikkut ineri-saanissamik suleqatigiiffiusumik ineriartortitsinissaanik ujartueqqullugit taamaaliornikkut nunatta pissarititai annerusumik avataanniit eqqussuineranut ikilisaataasinnaasunik alloriartoqarsinnaas-sammat.

Taamatut oqaaseqarlunga aalajangiiffigisassatut siunnersuut ingerlatippara neriullunga tigulluarne-qassasoq.

Pisortanut allaffisornikkut aningaasatigullu kingunissaa

Siunnersuut Aningaasanut inatsisip killiliussaannit tiguneqassammata Pisortanut kinguneqarna-vianngilaq.

Namminersorlutik inuussutissarsiortunut allaffisornikkut aningaasatigullu kingunissai

Namminersorlutik inuussutissarsiortunut kallerup innera, imeq kiassarnermullu naleqqiullugu toqoraavinnut appartitsineq atuisunit allanit nammaneqassaaq, uani inuussutissarsiortut allat ilanngullutik.

Inunnut Ataasiakkaanut allaffisornikkut aningaasatigullu kingunissasi

Namminersorlutik inuussutissarsiortunut kallerup innera, imeq kiassarnermullu naleqqiullugu toqoraavinnut appartitsineq atuisunit allanit nammaneqassaaq, uani assersuutigalugu atuisut nalinginnaasut.